


TEZAUUR LITURGIC
28 IANUARIE

SLUJBA
SF. IERARH
ISAAC
SIRIANUL,
EPISCOPUL
NINIVEI



MOSCOVA, 2000



Служба преподобному и богоносному отцу нашему Исааку Сирскому, епископу Ниневитскому

Стихиры, глас 4.

Подобен: Дал еси знамение:

Дал еси знамение / Церкви Твоей, Господи, /
Исаака святителя богомудраго, / иже деяние и
созерцание прошед сугубо, / на высоту
крестную добродетелей возшед, / отонудуже
покаяния стези возвестив / еже приближают
Твоему Божеству, // Иисусе Всесильне Спасе
душ наших.

Дал еси знамение, / якоже древле неневилянском,
/ Исаака богоглаголиваго, / иже во глубину
безмолвия вшед, / кита заклад мышленного, /
бисер боговедения обрет / и ночь неведения
потребив, / сокровище Твоея Славы открыв, //
Иисусе Всесильне Спасе душ наших.

Дал еси знамение / твою книгу, священне,
богодухновенную, / в нейже стези добродетелей
изъяснил еси / и тайны разгнул Духа / и
светозарный монашествующим показал еси рай
/ еже внутри сердца есть, / в няже молитвами
твоими нам исходатайствуй вход // у Иисуса
Всесильнаго Спаса душ наших.

Слава, глас 5:

Пустыннаго гражданина и отцев славу, /
неневитяном пророка новаго, / браздодержца
страстей, рачителя безмолвия, / Божественной
славы ревнителя / преподобнаго Исаака
возхвалим вернии, / иже мирскую суету
преобидев, / безплотным в подвиге соревновав
неослабно, / разумно на высоту возшед
высочайшаго зренья, / неизреченнаго Божества
светолития насладився / и возблистав
огнесловными поучении, / всю вселенную
просветив, / монашествующих красоту показав
незримую, / сей и нас причасниками соделай,
Христе Боже, // молитвами Твоего
Божественнаго Исаака.

Тропарь, глас 1.

Подобен: Камени запечатану:

Добре священствуя во градах, / и в пустынях
вселивыйся процвел еси, Исааче, / начальник
монашествующим показался еси / и учитель
подвижников, / сего ради память твою
достодолжно празднующе, сие зываем: /
слава прославльшему тя Христу, / слава тя
освятившему, // слава давшему нам тя,
предстателя искусного.

Канон, глас 8, егоже краестрочие: Пустынному иерарху немолчно песнь несу.

Песнь 1

Ирмос: Преславный в мори устроивый людем путь / Небесное нам шествие проходимо сотвори / да новую песнь поим Тебе, Господи.

Пустыни сирския процветение, пастыря мудрейша ниневитских граждан и рачителя священного безмолвия, в песнях псаломски богоноснаго Исаака похвалим, вернии, молитвенника о душах наших теплейшаго.

Уморил еси, отче, тлетворнаго льва гордыни, смирением на бесовския полчища ратуя яко копием, и несветящую тьму прелести развеял еси, твоих уст смиренных святолучными учении.

Суету преобидев мира, постническими борении страстей мглу одолел еси, и к высочайшему, отче, достигл еси безстрастию, и добротами украсился еси божественными.

Богородичен: Троицы явила еси Невидимыя едину Ипостась зриму, воплощением от Твоих Девических ложесн Превечнаго Слова, темже Тя Богородицу воистину проповедуют мирския концы и собори утверждают отеческия.

Песнь 3

Ирмос: Утверждаей на камени веры / на сем
созижду Мою Церковь, рекий, Господи, / спаси
меня вопиющая: / Ты еси, Христе, Сын Бога
Живаго / и в Тебе утверждается дух мой.

Искапаша твоя сладость уста, тебе
проповедающа снисшедшаго с небес Слова
Божия и пророческая на языке твоём
почивающая благодать, в вере утверждает
монашествующих святоотечестей.

Ниневитский град древний, тобою украшен отче
быв, председательствующу тебе милостивым
якоже архиерею подобает и чистым сердцем, но
не внят твоим, Исааче, священным глаголам,
темже и отпад от благочестия.

Несторианстей ереси отче противустал, в учении
познав прелесть ядоскрытую, и православную
иерарше мудрость избрав, любомудрейша в
безмолвие уклонился еси от смут церковных.

Богородичен: Отступите лживии, не клеветите
на святого вси вы западныя и риторы новыя; се
бо истинную Богородицу проповедует яве во
книзе своей Исаак, епископ Ниневийский и
правоправящий.

Седален, глас 4:

Церкви светлую звезду, сирския пустыни
Божественное украшение, гору безмолвия

досязающе небеси и монашествующих изрядное утешение, Исаака мудраго иерарха в песнях немолчно ублажим, иже в памяти своей точит почитающим неотъемлемую во искушениях помощь и постническая чины утверждает на избранном пути, и молит Человеколюбца спастися душам нашим.

Слава и ныне: Богородичен Минеи.

Песнь 4

Ирмос: Услышах, Господи, слух Твой и убояхся,
/ разумех неизреченное Твое смотрение / и
прославих, Слове, снисхождение Твое.

Монашествующим искусный наставник, Исааче, и постнических правил законоположник изряден был еси, свыше от Духа Святаго просвещаем, пустыни сирийския яко второе явился еси солнце, освященне.

Утреневав на всяку ночь непреложно, зарею твоих молитв просвещая мир, и страстей исторгая зловредныя корения, ралом твоих преподобне бденнонощных подвигов.

Изъяснив тайны духовныя, во мрак Божественный якоже Моисей вшел еси и естества надмирных чинов проразумел еси, Богоблаженне, херувимским твоим Исааче умом, трепетно вся испытуюя.

Богородичен: Елика хощеши Всемогущаго умолити можеши Бога отвратити гнев от нерадивых, но Твоих, Дево, певцов, и щедроты Твоя умножи православным людем, Тя хвалящим, Богоневесто.

Песнь 5

Ирмос: От нощи неведения / Боговедением просветивый концы / просвети мя утром человеколюбия Твоего, Господи.

Разумный Церкви светильник, пустынных отцев священная звезда, ныне святой Исаак Боговедения просвещает зарями яже к постническому приступают ристалищу.

Ангелов согражданине Исааче, градский мирский мятеж избега еси, в пустыню вселившийся и на висоцей добродетелей горе твое жительство поставив, яко град богомудре Божий.

Рачением распалився Божественным, страстей вся терновная попалил еси и ревности твоя огнесветлой силою, в горняя яко искра востекл еси, истончивши плоть твою богоносе постом.

Богородичен: Ходатайству Твоему Богомати притек, весь приземлен имею ум, и нощь мя снедает отчаяния, но простри светозарный Твой покров, и посрамятся борющии мя беси.

Песнь 6

Ирмос: Во Исааце страсть прописавый / и во Ионе погребение прообразовавый / и Воскресение всем подай, / Тебе вопием с пророком: / от тли нас возведи, Благоутробне Господи.

Упразднився, отче, дел житейских, в море священных Писаний пусился еси, и глубину Божиих Таин испытав, бисер Богопознания обрел еси, имже и просветився, Исааче, и показался еси евангельский воисину и пребогатый купец.

Ниневитяном Евангельски Бога проповедавав, любовь примиряя во вражде сущих и ходатай заблудших быв, и кающимся путевождь и пустыножителем законоположник богомудрейший, темже яко пастыря тя воспеваем искуснейша и предстателя о душах наших и молитвенника теплейша.

Егоже в пустыню вселивый яко во чрево китово, егоже и проповедника показавый воскресения мысленнаго, сего Исаака приводим Тебе в молитву яко дерзновенника сущи чистейшаго, с нимже субботствовать от страстей сподоби вопиющим: от тли нас возведи Благоутробне Господи.

Богородичен: Марии Богоотроковице песенно радование принесем вернии, Гавриилу

подражающе сие рцем: радуйся, легкий облаче
носящий Солнце будущего века; радуйся,
светозарнейшая твердь Духа Святаго; радуйся,
престоле огненный и серафимов песнь
светлейшая; радуйся утешение христиан,
Богоневесто.

Кондак, глас 8.

Подобен: Взбранной:

Яко иерарха Богоноснаго и преподобнаго, /
учредителя пустыни ты восхваляем, / Исааче
священноявление, предстателю наш. / Но яко
имеяй дерзновение ко Господу, / о всех моли
чтущих ты и взывающих ти: // радуйся, отче
богомудре.

Икос:

Архиерейскою одеждею одеаяся, постную
пучину преплыв воздержания ветром, в тишине
водворився безмолвия преподобне отче, и
премирныя тайны постигл еси Херувимским
твоим умом. Яко иерарх учредив твою кафедру
в горе пустынной и чины иноческия просветив
твоим житием, мирския же концы огласив
тайноводственными твоими речении и вышней
митрополии сослужитель явился еси, темже
почудившись зело твоим исправлениям,
благодарно тебе вопием:
Радуйся, пустыню орошающая Божественная
манна;

радуйся, постнических чинов вжиляющая сила.
Радуйся, созерцатель Херувимских тайн;
радуйся, постом низложивший бесовскую рать.
Радуйся, Домовладыки Христа преукрашенный
доме;
радуйся, Божественного страха богатство и
честь.
Радуйся, великая смиренномудрия славо;
радуйся, любви излиянное миро.
Радуйся, благовонное молитвы кадило;
радуйся, тайновещатель будущего века.
Радуйся, Исааче, отче богомудре.

Песнь 7

Ирмос: Божия снисхождения / огонь устыдися в
Вавилоне иногда, / сего ради отроцы в печи
радованною ногою / яко во цветнице, ликующе,
пояху: / благословен еси, Боже отец наших.

Огненный твой язык, преподобне, все попоалет
страстей терновныя дебри и горнее
мудрствовать восхищает иночестии умы,
красоты показуя созерцания, и яко орган
сладкогласный уста твоя благословят выну Бога
отцев наших.

Лицы просветив монашествующих, отче
богоносе, восшедшу тебе якоже солнцу в
пустыне, и блистанием твоих учений,
языкоболие философов посрамив, пути

познания истинно пронаписующа.

Чистота сердца твоего, славу тебе и богатство яви видения Божия, темже и умилился отче яко дитя, и позабыв мимотекущая мира сего вся и скорбная, и недро Иисусово облобызав, и небоходец быв, Исааче, таинственными созерцаньми твоими.

Богородичен: Нестория еретика биется лице, не восхотевшаго мудрствовать Тебе Богородицу Чистую, и Исаака Сириянина ныне прославляется житие: Деву Тя исповедавшего и по Рождестве Богородицу истинную.

Песнь 8

Ирмос: Нечестия органы иную песнь /
благочестия же благовещаннии пояху гусли: /
благословите, дела Господня, Христа во веки.

Огненные твои Исааче и крестолучные простираеши молитвы лучи, и разиши амалика, преподобне, мысленного, и бесовскую прелестную всю прогоняеши тьму и полцы монашествующих изводиши в долину спасения.

Полны ланиты твоя аромата духовного, и уста твоя сладость учения провещают, и движимый твой язык яко скорописная трость, красоту начертавает православного подвига.

Смиреномудрия венцем тебе увязает Святая Троица и преестественным вселяется в тя

светом, и сердце твое светозарен дом показывает,
и огнедохновенными твои являет уста, имиже
трегубно поеши Ю во вся веки.

Богородичен: Неискусобрачная Дево, Едину убо
Ипостась во двою естеству, Всенепорочная,
родила еси Воплощенного Бога, Егоже яко
человека совершенна и Бога совершенна поем
во веки вся.

Песнь 9

Ирмос: Да умолчат еретиков собрания, / не
истинно Богородицу исповедающих Тя, / ибо
свыше Тя пророцы проповедаша, / Матерь быти
Божию / и Ходатаицу рода нашего, / тем Тя,
Дево, величаем.

Небомудренная твоя душа, в райский вселися и
пренебесный чертог, идеже лепотами
наслаждаешься Божественных видений, ихже
зрел еси тайновидче, еще на земли сый, и в
книге начертав, юже и оставль нам яко лествицу
небовосходную.

Евангельскою облеклся еси простотою,
постническою раздрав пращею ризы греховныя,
и в виссон святых одеаяся, Исааче, и уже не
молитвою молишися, но водворяешься лицом к
лицу к Свету Высочайшему, идеже помяни нас,
тя величающих.

Совершенство на земли совершив, обителей
прошедшу тебе всех добродетелей и к
Горнейшему Свету преселился еси, со
ангельскими чинми в совершенство лучшее
простираяся, но не забуди, богоблаженне
Исааче, чада твоя, любовию тя величающия.

Богородичен: Утроба Твоя Свет неприступный
приимши неизреченно Богородице Дево и
просветила еси сущия во тьме жития, славити
благочестно Христа во дву существу
прошедшего из Тебе несказанно, единого же
Ипостасию.

Светилен:

Мудрование плоти умертвив в постных
борениях, / от страстей субботствовав
преподобне, / зарею Духа оживил еси ум, / и
прежде смерти мысленное воскресение
проповедал еси, досточудне Исааче, / темже тя
любовию ублажаем.

Стихиры на хвалитех преподобным, глас 2.

Подобен: Киими похвальными венцы:

Киими похвальными венцы / увязем Ефрема и
Исаака, / единовсельников пустыни сирския, /
единомудренных нравом и душою, /
Богопроповедников пустыннолюбцев, / оваго
убо яко облако благодати слезоросящее, / оваго
же яко небесных созерцаний столпа огненного, /

сих бо ради монашествующие сланое море
страстей прешли / и венцы от Христа прияша
нетленные, // имеющего велию милость.
иими песенными добротами / воспоем Ефрема
и Исаака, / Боговедения воды напояющая
пустыни концы, / монашествующих
сладкопитатели, / реки приснотекущая учений,
/ сердца умиляющая, / чистых слез великия
моря, / в нихже Христос мысленных фараонит
полки потопив, // имей велию милость.

Киими духовными пеньми / похвалим Ефрема и
Исаака, / Богоразумия криле постников
окриляющая, / органы духовнаго вдохновения,
/ славии добропесненнии, / иже прописаша
восхождения к Богу в книгах своих, / сирины
поистине Божественнии, / имиже сонное
сонмище демонов Христос поразив, // имей
велию милость.

Киими сладкозвучными гусльми / прославим
Ефрема и Исаака, / богословия трубы
духодвижныя, / громи духовнии нечестивых
ужасающая / и вселенную оглашающая, /
молнии прогоняющие тьму греха / и
благочестием озаряющая, / фиалы исполнь
духовнаго утешения, / сладказвучныя кифары
молитв, / имиже Христос умолен бывает // и
подает велию милость.

Слава, глас 6:

Иже на горах боговедения вогнездишася / и
пустынолюбных собрание обучиша небесному
жительствоу, / удаляющий от стремнин греха и
показующий добродетелей восход, / стези
светлейшии и прямыя, / молитвы светила и
покаяния образи, / небопарнии орли Церкви
крыла огненная, / Ефрема радостопечального и
Исаака небомудренного / в песнях возвеличим и
призовем: / приникните к нам, отцы, с высоты
вашего смирения / и нашу нищету ущедрите, /
восполняя молитвами вашими скудость наших
дел, // яко пребогатии.

